



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu imprensa

Periodu : Juñu 2010

Edisaun: 21 Juñu 2010

Ministériu Justisa lansa planu estratéjiku setór justisa nian ba periodu tinan 2010-2030

Iha dia 17 Juñu Ministériu Justisa, lansa planu estratéjiku setór justisa nian husi periodu tinan 2010-2030. Marka prezensa iha lansamentu planu estratéjiku ne'e, aleinde Ministra Justisa, Prezidente Tribunal Rekursu, Adjuntu Prokurador Jeral, Diretor Jeral Defensoria Pública no Representante Espesiál Sekretáriu Jeral UNMIT nian, Sra. Ameraah Haaq, ne'ebé ida-idak hato'o sira nia deklarasaun final antes asina dokumentu planu estratéjiku ne'e. Aleinde figura xave sira iha setór justisa formal nian, marka mos prezensa Sr. José Luis Guterres, Vise Primeiru Premeiru no eis Prezidente RDTL, Sr. Francisco Xavier do Amaral no konvidadu sira seluk.

JSMP kongratula esforsu maka'as ne'ebé mak Ministériu Justisa halo ona hodi lansa planu estratéjiku bá setór justisa ninian, no sente orgullu tebes ho planu ne'e tanbá planu ne'e ninia preve kuadru planeiamentu ba asesu ba justisa husi tinan 2010- 2030. Planu estratéjiku ne'e ho vizaun *“dalan bá justisa husi ema hotu-hotu, ho baze ne'ebé iha respeito bá direitu ema ninian no bá estadu direitu demokratiku”*.

Luis de Oliveira Sampaio, Direitór Ezekutivu JSMP haktuir katak lansamentu bá Planu Estratéjiku ne'e hanesan pasu importante ida hodi lori justisa bá ema hotu. Mesmu preukupa nafatin katak mehi atu fornese justisa ba ema hotu parese sei akontese iha longu prazu nia laran, maibé pelu menus ita iha ona konseitu ba enkuadramentu no mata-dalan vizaun justisa ba periodu ruma nia laran.

Ministra Justisa Sra Lúcia Lobáto iha ninia intervensaun haktuir katak antes atu bá to'o faze lansamentu ne'e Ministériu Justisa halo ona esfrosu hot-hotu hodi bele akumulá no kompila ema hotu nia hanoin, atraves husi workshop iha nivel nasional hodi konsulta bá ulun boot polítiku na'in sira, bá nivel operacional, hodi promove partisipasaun no haluan debate bá entidade no professional sira tomak nu'udar forma ida hodi hetan kontribuisaun prinsipal bá hakerek planu estratéjiku ne'e. JSMP hanoin katak Planu Estratéjiku bá Setór Justisa nu'udar meus ida hodi mellora ita nia sistema judisiariu iha futuru. Maske nune'e, JSMP mós preukupa nafatin tanbá área temátika lima (5) inklui asuntu lingua hanesan setór prioridade ne'ebé iha prátika sempre sai hanesan barreira ka obstákulu bá sidadaun tomak atu bele asesu bá iha justisa. Maske klaru katak Planu Estratéjiku ne'e hatudu indikasaun hodi hametin lian Português iha administrasaun

justisa, maibé JSMP hanoin katak kestaun lingua sei kontinua sai problema no impedimentu hodi atinzi vizaun justisa ne'ebé ita defini iha dokumentu Planu Estratéjiku ne'e.

JSMP hanoin preukupadu uitoan tanbá oinsá ita bele lori justisa besik bá sidadaaun hotu, wainhira asuntu lian ka lingua ita nunka hatu'ur hanesan komponente importante no prioridade bá Planu Estratéjiku ida ne'e. Maske nune'e, JSMP hein katak iha futuru, durante implementasaun planu estratéjiku ida ne'e sei iha konsiderasaun ba asuntu lingua hanesan prioridade atu inkorpora iha Planu Estratéjiku ida ne'e.

Atu hetan informasaun kle'an favor kontaktu:

Luis de Oliveira Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883